

Jang  
kita keep  
3/10/03



**Dr. Mahathir -  
Siti Hasmah:  
Pasangan ideal  
yang tiada  
cacat cela**

Muka 4

# SENI

JUMAAT UTUSAN MALAYSIA  
31 OKTOBER 2003

**PM dari  
kaca mata  
insan seni**

Muka 2



## Terima Kasih Dr. Mahathir

UM 31/10/2003 - 4 PRECISE

Kami tulis kata-kata ini dalam baris-baris puisi  
Untuk menyatakan setinggi-tinggi penghargaan  
Dan merakamkan sedalam-dalam terima kasih  
Kepada wira bangsa yang sangat berjasa  
Yang Amat Berhormat  
Datuk Seri Dr. Mahathir Mohamad.

Kami lafazkan kalimat-kalimat syukur  
Kepada Allah Yang Maha Rahim dan Maha Rahman  
Kerana Dia telah mengutus Tuan  
Untuk menjadi pemimpin rakyat  
Untuk membangun watan keramat  
Untuk memperkasa negara berdaulat  
Negara dan bangsa Malaysia penuh martabat.

Kami menyambut Tuan sebagai kurnia Allah  
Kepada rakyat, bangsa dan negara Malaysia  
Tuan telah diamanahkan untuk menjadi nakhoda perkasa  
Menjadi nakhoda bahtera bangsa  
Melayari alunan ombak dalam negara  
Mengharungi gelora gelombang antarabangsa  
Merentas samudera demi samudera.

Kami hargai kepimpinan Tuan memberi teladan  
Tuan seru pemimpin dan rakyat merubah sikap  
Mesti bersih, mesti amanah dan mesti cekap  
Tidak usah lagi berkiblat ke Barat  
Ambillah iktibar dari seluruh penjuru dunia sejagat  
Begitulah semestinya sifat dan tekad  
Bangsa merdeka, bermaruah penuh martabat

Kami kagumi fikiran Tuan berpandangan jauh  
Mencetuskan gagasan demi gagasan  
Maka tercetuslah Wawasan Dua puluh-Dua puluh  
Melakar matlamat pembinaan negara bangsa  
Yang maju dan bersatu padu

Melakar matlamat pembangunan sosial dan ekonomi  
Pertumbuhan yang pesat dan pengagihan yang adil  
Melakar pembinaan masyarakat yang bermoral dan berbudi  
Membina tamadun bangsa mengikut acuan kita sendiri  
Semuanya terangkum dalam Wawasan Sakti  
Wawasan Dua Puluh-Dua Puluh yang Tuan ilhami

Tuan telah membangkitkan martabat  
Dan keyakinan diri satu bangsa  
Dengan keyakinan kita boleh dan kita sanggup  
Tuan gelorakan semangat bangsa  
Untuk menggerakkan potensi, minda dan tenaga  
Mempelopori penerokaan demi penerokaan

Dengan galakan dan ilham yang Tuan tanam  
Putera puteri bangsa berhati cekal menghadapi setiap cabaran  
Menempuh dan merempuh rintangan demi rintangan  
Menempah kejayaan demi kejayaan  
Menjulung harum nama Malaysia di persada dunia

Dengan pandangan jauh ke hadapan  
Tuan bina mercu-mercu tanda gagah perkasa  
Untuk keperluan sebuah negara maju dan moden  
Untuk kebanggaan dan martabat bangsa bermaruah

Yang Amat Berhormat  
Datuk Seri Dr. Mahathir Mohamad  
Sesungguhnya Tuan adalah kurnia Allah yang sangat istimewa  
Untuk rakyat, bangsa dan negara Malaysia

Atas segala jasa dan bakti Tuan  
Terima kasih kami tiada terhingga  
KAMI BERSYUKUR KEPADA ALLAH

- Profesor Datuk Dr. Firdaus Abdullah  
Universiti Malaya